

BOSNA I HERCEGOVINA
FEDERACIJA BOSNE I HERCEGOVINE
ZENIČKO DOBOJSKI KANTON
OPĆINSKI SUD U TEŠANJ
Broj: 39 0 K 075733 24 K
Dana, 20.08.2025. godine

U IME FEDERACIJE BIH

Općinski sud u Tešnju, sudija Bekrić Hidajeta, uz sudjelovanje zapisničara Hidajeta Mehinović, u krivičnom predmetu protiv optuženog A. S. sina S. iz R. broj 435, općina T., zbog krivičnog djela napad na službenu osobu u vršenju poslova sigurnosti iz čl. 359. stav 2. u vezi sa stasvom 1. Krivičnog zakona Federacije Bosne i Hercegovine, po optužnici Kantonalnog tužilaštva ZE-DO kantona Zenica broj T04 0 KT 0059917 24 od 12.11.2024. godine, nakon održanog glavnog pretresa u prisutnosti tužitelja Kantonalnog tužilaštva ZE-DO kantona Tomaš Branislava, optuženog i njegovog branioca Bošnjak Berine advokata iz Jelaha, dana 20.08.2025. godine donio je sljedeću:

P R E S U D U

Optuženi A. S., sin S. i majke F. rođene A., rođen ..., godine u mjestu R., općina T., gdje je i nastanjen, R. broj 435, pismen sa završenom SSS, po zanimanju medicinski tehničar, oženjen, otac troje djece, lošeg imovnog stanja, Bošnjak, državljanin BiH, JMBG: ..., *neosuđivan*,

K R I V I J E

Što je,

Dana 04.08.2024. godine, u mjestu Jelah, na području općine Tešanj, ozbiljno prijetio da će napasti službene osobe u vršenju poslova javne sigurnosti i napao službenu osobu u vršenju poslova javne sigurnosti, tako što je, nakon što su ga policijski službenici Hotić Caco i Kršić Anđelko lišili slobode, po prijavi da je narušavao javni red i mir i smjestili na zadnje sjedište u službeno policijsko vozilo, uz psovke i uvrede više puta uputio policijskim službenicima prijetnje da će im pobiti komplet porodicu, prvo žene i djecu, pa njih, da bi u jednom momentu glavom udario Hotić Cacu u vrat, nanijevši mu laku tjelesnu ozljedu u vidu nagnječenja vrata desno, svjestan i znajući da ozbiljnim prijetnjama policijskim službenicima i udarcem glavom napada službenu osobu, te da policijskom službeniku može nanijeti laku tjelesnu povredu, što je sve i htio,

Čime je počinio krivično djelo „Napad na službenu osobu u vršenju poslova sigurnosti“ iz člana 359. stav 2. u vezi sa stavom 1. Krivičnog zakona Federacije Bosne i Hercegovine, pa se na osnovu istih zakonskih odredaba, te odredaba člana 43. i 49. Krivičnog zakona Federacije Bosne i Hercegovine,

OSUDUJE

Na kaznu zatvora u trajanju od 6 (šest) mjeseci

Optuženi se obavezuje na plaćanje troškova krivičnog postupka u iznosu od 144,47 KM, u roku od 30 dana od dana pravosnažnosti presude.

Obrazloženje

Kantonalno tužilaštvo ZE-DO kantona Zenica optužnicom T04 0 KT 0059917 24 od 12.11.2024. godine, optužilo je A. S. zbog krivičnog djela Napad na službenu osobu u vršenju poslova sigurnosti iz čl. 359. st. 2. u vezi sa st. 1. Krivičnog zakona Federacije Bosne i Hercegovine (u daljem tekstu KZFBiH), počinjenog na način, vrijeme i mjesto kako je to pobliže opisano u optužnici, temeljeći optužbu na dokazima koji su prikupljeni u istrazi i predloženi u optužbi.

Sudija za prethodno saslušanje ovog suda potvrdio je navedenu optužnicu dana 26.11.2024. godine, zakazao ročište radi izjašnjenja o krivnji, na kojem ročištu je optuženi izjavio da poriču krivnju pa je i zakazan glavni pretres.

U toku glavnog pretresa održanog dana 20.08.2025. godine, optuženi A. S. u uvodnom izlaganju izjavio je da je izvršio predmetno krivično djelo na na način, vrijeme i mjesto kako je to opisano u optužnici i da priznaje krivnju po ovoj optužnici.

Priznanje optuženog je potpuno i u skladu sa dokazima u spisu i to: Nalaz i mišljenje stalnog sudskog vještaka medicinske struke Mujić dr Hasiba od 11.11.2024. godine, Prijava o ozljedi JZU Dom zdravlja „Izudin Mulabećirović-Izo“, HMP Tešanj, broj 19406/24 od 04.08.2024. godine na ime Hotić Caco sin Mesuda, rođen 1975. godine. Spisak troškova od 12.11.2024. godine, Izvod iz kaznene evidencije PS Tešanj broj 08-02-11/1-03-10-11-8619/24 od 15.08.2024. godine za osumnjičenog A. S., Nalaz i mišljenje stalnog sudskog vještaka medicinske struke Mujić dr Hasiba od 11.11.2024. godine, Zapisnik o ispitivanju osumnjičenog A. S. od 26.09.2024. godine, Zapisnik o saslušanju svjedoka Hotić Cace od 13.08.2024. godine, Zapisnik o saslušanju svjedoka Kršić Anđelka od 13.09.2024. godine, Zapisnik o saslušanju svjedoka Šaćirović Elvira od 27.08.2024. godine, Zapisnik o saslušanju svjedoka Artuković Samira od 26.08.2024. godine, Zapisnik o saslušanju svjedoka Saltagić Almira od 14.08.2024. godine.

Uvjerjenje suda je da je do priznanja krivnje došlo sa razumijevanjem, te da je optuženi svjestan svih posljedica i obaveza koje proističu iz priznanja krivnje, te da postoji dovoljno dokaza o krivnji optuženog, pa je sud i prihvatio priznanje optuženog.

Iz provedenih dokaza, kako iskaza saslušanih svjedoka, tako i materijalnih dokaza, jasno proizilazi da je optuženi počinio radnje opisane u činjeničnom opisu optužnice, odnosno da je dana 04.08.2024. godine u mjestu Jelah, općina Tešanj ozbiljno prijetio da će napasti službene osobe u vršenju poslova javne sigurnosti, a zatim nakon što su policijski službenici Hotić Caco i Kršić Anđelko istog lišili slobode po prijavi da je narušavao javni red i mir i smjestili na zadnje sjedište službenog vozila, psovao, vrijeđao i više puta uputio policijskim službenicima prijetnje da će im pobiti komplet porodicu, prvo žene i djecu pa njih, te u jednom momentu glavnom udario Hotić Cacu u vrat i tako mu nanio laku tjelesnu povredu u vidu nagnječenja vrata desno, svjestan i znajući da ozbiljnim prijetnjama policijskim službenicima i udarcem glavom napada službene osobe i da može nanijeti laku tjelesnu povredu, a što je sve i htio.

U ovakvim radnjama optuženog stiču se sva bitna obilježja krivičnog djela „Napad na službenu osobu u vršenju poslova sigurnosti“ iz člana 359. stav 2. u vezi sa stavom 1. KZ FBiH.

Optuženi je bio svjestan svog djela i htio je njegovo izvršenje, a ne postoje okolnosti koji isključuju odgovornost optuženog, pa je sud optuženog i oglasio krivim i osudio kao u izreci presude.

Prilikom odlučivanja o vrsti i visini krivično pravne sankcije, sud je cijenio na strani optuženog sve okolnosti koje utiču na odmjeravanje vrste i visine krivično pravne sankcije. Od olakšavajućih okolnosti sud je našao da optuženi priznaje izvršenje djela koje im se stavljaju na teret, da je neosuđivan, dok otežavajućih okolnost nije našao na strani optuženog, pa cijeneći okolnosti pod kojima je došlo do izvršenja ovog krivičnog djela, to je sud optuženog i osudio na kaznu zatvora u trajanju od 6 mjeseci,

smatrajući da je ova bezuvjetna kazna zatvora srazmjerna nastalim posljedicama i adekvatna ličnosti počinioca i da će se sa izrečenom kaznom u potpunosti postići svrha kažnjavanja iz člana 42. KZ FBiH kako u pogledu specijalne tako i u pogledu generalne prevencije.

U smislu odredaba člana 202. stav 1. u vezi sa članom 199. ZKP-a FBiH sud je optuženog obavezao na plaćanje troškova krivičnog postupka u iznosu od 144,47 KM, a koji troškovi se odnose na troškove vještačenja u iznosu od 94,47 KM i sudski paušal u iznosu od 40,00 KM, a sve u roku od 30 dana od dana pravosnažnosti presude.

Na osnovu svega navedenog odlučeno je kao u dispozitivu ove presude.

PRAVNA POUKA:

Protiv ove presude dozvoljena je žalba
Kantonalnomo sudu u Zenici putem ovog suda
u roku od 15 dana od dana prijema presude.

SUDIJA

Bekrić Hidajeta